



## INTRODUCZIUN

DA SUR MATIN BEARTH

*Ozildi sedamondan geniturs ed educaturs bein enqualga, tgei ch'els hagein fatg falliu che lur educaziun, lur stenta d'educar endretg lur affons, pari dad esser stada adumbatten. Cu jeu audel quels plaids plein pitgira patratg'jeu vid nos èrs da pli baul. Cun gronda fadigia aravan e semnavan nus els, mo buc in soli èr fuva la finala senza zercllem, malgrad che nus vevan aunc fatg breigia da zerclar el. E tonaton raccoltavan nus biaras e bialas spigias. Quei vala era per l'educaziun. La giuventetgna da nies temps viva propi en in auter mund che nus pli vegls. Ton ei semidau bunamein sin tuts secturs. Quei «auter» ei per bia buca tut mender. Nus tuts gudin bia da quei ch'ei vegniu meglia. Sco nos èrs duvravan bia temps, sulegl, plievgia e vent per semadirar, drova era il carstgaun giuvan temps e peda ed era «sulegl e plievgia» e schizun enqual «suffel e stemprau» per semadirar en quei mund semidau. La raccolta stat alla fin.*

*Nies Diu misericordeivel careza nus infinitamein, era la giuventetgna da nies temps. Jesus di che Dieus laschi crescher salin e zercllem tochen il di dalla raccolta. Pli che scadin da nus carstgauns ha El interess d'ina buna raccolta. Ed el segida leutier.*

## EVANGELI

Mt 13,24–43

<sup>24</sup>El ha raquintau ad els in'otra semeglia culs plaids: Cul reginavel da tschiel stat ei aschia: In um ha semnau bien sem en siu èr. <sup>25</sup>Mo ferton che la glied durmeva, ei siu inimitg vegnius ed ha semnau zercllem enamiez la salin ed ei ius per siu fatg. <sup>26</sup>Cura ch'il schiermet ei carschius siadora ed ha fatg spigia, ei era il zercllem vegnius neunavon. <sup>27</sup>Cheu ein ils survients dil patrùn vegni ed han detg: Signur, has ti buca semnau bien sem en tiu èr? Danunder deriva pomai il zercllem? <sup>28</sup>El ha rispundiu ad els: Quei ha igl inimitg fatg. Ils survients han dumandau el: Duein nus forsa ir e rimnar il zercllem? <sup>29</sup>Na, di el, schiglioc savesses vus, cun rimnar il zercllem, era sdrappar ora la salin. <sup>30</sup>Schei crescher domisdus tochen il di da raccolta. Il di da meder vi jeu lu dir als medunzs: Rimnei igl emprem il zercllem e ligei el en faschs per barschar. La salin denton menei en miu garner.

<sup>31</sup>In'otra semeglia ha el raquintau ad els schend: Cul reginavel da tschiel stat ei aschia: In um ha priu in garnetsch da senav e semnau en siu èr. <sup>32</sup>Quei ei bein il pli pign da tut ils sems. Mo cura ch'el ei carschius, eis el pli gronds che tut las jarvas e daventa ina plonta, da maniera ch'ils utschals dil tschiel vegnan e fan igniv en sia roma.

<sup>33</sup>Aunc in'otra semeglia ha el raquintau ad els: Cul reginavel da tschiel stat ei aschia: Ina femna ha priu levon e turschau en treis mesiras frina, tochen che tut ei stau entschadau.

<sup>34</sup>Tut quei ha Jesus detg allas fuolas en semeglias, e senza semeglias plidava el buca cun els, <sup>35</sup>per ch'il plaid dil profet mondi en vigur:

Jeu vi arver mia bucca en semeglias,

vi palesar caussas zuppadas dapi la fundaziun dil mund.

<sup>36</sup>Lu ha Jesus relaschau las fuolas ed ei ius a casa. Ses giuvnals ein vegni tier el ed han detg: Declara a nus la semeglia dil zerclen egl èr. <sup>37</sup>El ha rispundiu ad els: Quel che semna il bien sem ei il Fegl dil carstgaun. <sup>38</sup>Igl èr ei il mund. Il bien sem, gliez ein ils affons dil reginavel. Il zerclen, gliez ein ils affons dil nausch. <sup>39</sup>Igl inimitg che semna ei il giavel. La raccolta ei la fin dil mund. Ils medunzs ein ils aunghels. <sup>40</sup>Sco il zerclen vegn rimnaus e barschaus enta fiug, aschia vegn ei era ad esser alla fin dil mund: <sup>41</sup>Il Fegl dil carstgaun vegn a tarmetter ses aunghels, e quels vegnan a rimnar ord siu reginavel tut quei che dat scandal e tuts malfa tschents <sup>42</sup>e fierer el fuorn ardent; leu vegn ad esser bargir e sgriziar ils dents. <sup>43</sup>Lu vegnan ils gests a resplender sco il sulegl el reginavel da lur Bab. Tgi che ha ureglias, teidli!